



LAMEPA

LOMIGA FAAPITOA:
IANUARI 2019

EKALESIA FAAPOTOPOTOGA KERISIANO AMERIKA SAMOA

ANOTUSI

Fa'apaia le Galuega: Malumalu 'UA TAUNUU'	1
Saunoaga Fa'afetai a le Ta'ita'ifono	1
Upu a le Fa'atonu	2
Sāōga a Pulega	3
Fesoasoani a le Mafutaga Aoao a Tina	4
Mea Alofa a le EFKS	4
Taalolo a Leusoalii	5
Sauniga o le Fa'apaiaina 'UA TAUNUU'	5
Tala o le Galuega: Failautusi Aoao & Teutupe EFKAS	7
Lauga: Tautiaga Senara FT, Ta'ita'ifono EFKS	8
Lauga: Faaeteete Saifoloi FT, Ta'ita'ifono EFKAS	10
Mea Alofa mo le 'UA TAUNUU'	12
Fa'afetai Fa'apittoa: Rev. Dr. Elekosi Lafitaga, FFA	13

FA'APAIA LE GALUEGA: MALUMALU 'UA TAUNUU'



O le taeao ulla ma le taeao manino, a o fa'apea ona sulugia e ave malolosi o le La le aso 18 o Ianuari, ina ua patilima le fanau a le Atua ma osiosi le fa'amanu ma le fa'aneetaga, aua ua fa'aifomanu le fa'amoemoe sa nono i le Atua, aua le fa'apaiaina o le malumalu UA TAUNUU. Sa molimauina foliga va'aia o le alofa o le Atua i lea aso, i le fa'atumulia ai o le Ekalesia Aoao ma le mamalu o le 'au valaaulia sa mafai ona 'auai. Sa atofa le aso 18 o Ianuari

mo leni fa'amoemoe taua, ina ia tauluga ai fonotaga a Komiti Tumau a le Ekalesia e masani ona faia i lea vaitau O fonotaga ia a Komiti Tumau, e malaga mai ai sui o Pulega ma Matagaluega a le EFKAS o loo atunuu i fafo. O le agaga fiafia ma le agaga vivii i le Atua, ina ua mafai ona 'auai mai sui o Pulega ma Matagaluega a le EFKAS i atunuu i fafo, e fiafia ma molimauina fa'atasi leni aso fa'amoemoeina; e aofia ai totino uma o le Komiti a le 'Au Toeaina, le Komiti o Feau Eeseese, le Komiti Fa'amisionare, le Komiti o Tupe, ma le Komiti o Aoga.

Sa valaaulia fa'apittoa fa'auluuluga o Ekalesia So'o Fa'atasi i Amerika Samoa: o le Afioga i le Bishop ia Peter Brown, Ta'ita'i o le Ekalesia Katoliko Roma Puleaga Samoa i Pago Pago; o le Afioga i le Sea ia Asi Tuisalega, Sinoti Amerika Samoa-Ekalesia Metotisi Samoa; o le Susuga i le Toeaina ia Faamao Asalele, Ekalesia Faapotopotoga Iesu i Samoa, ma le Susuga i le Faifeau ia Sauleone Aigofie, Taita'ifono a Ekalesia So'o Fa'atasi Amerika Samoa.

Sa valaaulia fa'apittoa foi fa'auluuluga o le Faigamalo a Amerika Samoa: o le Afioga i le Kovana Sili, Lolo Matalasi Moliga; le Afioga i le Peresitene o le Senate, Gaoteote P. Tofau; le Afioga i le Fofoga Fetalai o le Maota o Sui, Savali Talavou Ale; fa'atasi ai ma le Afioga i le Faamasino... **Fa'aaauu itulau 3**

SAUNOAGA FA'AFETAI A LE TA'ITA'IFONO

"Ua fa'afetai ua maua mai leni tausaga fou. Auā le pule mai luga, ua tausia ai tatou." Ua a'e ma le malo lou la to i le tai le Ekalesia. Ua tatou 'oa'oa ai nei i faleseu ma sa'a i ma'a o malie ina ua o gatasi le futia ma le umele, auā le pule fa'asoifua a le Atua i lo outou soifua ma si o matou ola. Ua tatou la'asia le 2019 sa taupule ma taumate, a o leni ua fesilafa'i i luma o nu'u a e le o tua o nu'u. Ia viia ma fa'afetaia lava le Atua Alofa, o le tufuga ma le mataisau o lo tatou ola.

Avea ia le Suafa Manumalo o Iesu Keriso le Ao o le Galuega, e ofo alofa atu ai ma fa'amanuia atu ai i galuega, tiute ma faiva o le a feagai ai ma le Ekalesia aoao, aemaise le lavaloa i 'aulotu o le Ekalesia i tulimanu e fia o le kolope. Taofi lava, sa le' tu'ulafoaina i tatou e le mana o lona Alofa Tunoa.

Fa'afetai i le tōfā i Komiti o le Au Toeaina. O le komiti e matua i ai le tu'u auā le Ekalesia ma le soifua fa'aleagaga o ona tagata. Malo fa'atautai ma lagolago. Mo komiti tumau uma a le Ekalesia, fa'afetai galulue. Fa'apito augafa se upu i le Komiti o Feau Eeseese, lau Afioga i le Ta'ita'i Komiti, Le'i Sonny Thompson TK, ma le ofisa, Iasepi Ulu FS le failautusi a le Komiti, malo toa malo tau, ua le ole lea. E le... **Fa'aaauu itulau 2**

Upu a le Fa'atonu

O le vi'iga ma le fa'afetai i le Alii ina ua alafa'i mai le Atunu'u ma le manuia i lona alofa ma lona agalelei. Ua tuana'i le Tausaga Tuai na tauasa mai ai ma le tele o le fiafia a e fa'apea foi o puapuaga peita'i, ua tatou feagai ma lenei Tausaga fou i le tamāoaiga o mea ua maua, o le fa'aaogāina o i tatou i galuega ua vala'auina i ai, o fanau ua fa'a-ao'ogaina, o le atunu'u ua galulue mo le manuia o le Atunu'u, o le Tala Lelei ua folafolaina e le 'au faigaluega, o le tamāoaiga o lo tatou si'osi'omaga i fuata fa'apea mea ua totōina, o le atina'eina o tatou laufanua ma fale, a e fa'apea nisi o puapuagā o aga'i mai o lo'o lilo i la tatou va'ai, o le Alii lava na te aumaia le fa'amalosi 'au e lona Agaga e fa'aauau ai la tatou faigamalaga, ma o le vi'iga lea i le Atua e tumau atu ia te ia e le aunoa.

I lenei tausaga fou ua punonou lou Atunu'u ma le Ekalesia i le Fuifui Lotu o lenei tausaga e pei ona masani ai, ina ia fa'afogaina e le Alii le vala'au atu a ou tagata, ma aumaia o taiala e ta'ita'i ai le savaliga i lenei tausaga fou. Ua tatou fa'alogologo i le Upu a le Alii o lo'o i ai le malosi ma lona mana, o le Upu na faia ai mea uma mai le amataga, o le Upu na 'aveina ae' ai Mose mai le vao 'utu'utu, ma fa'ailoa ia Mose le afi mumū e le mate, o le agaga o le Alii ua fa'ailoa mai ia Mose na te aumaia o lona nuu mai Aikupito, o le Upu e ta'ita'ia ai lona nuu i le Tula-fono, o le Upu ua ta'oto ai le faiva o le Salevī ma le fa'atinoga o le osiga o le taulaga ma le tapuaiga, o le Upu ua fa'ata'otoina ai nuu ma le si'osi'omaga o le tagata e soifua ai, ma fa'ailoa le fainumera o tagata tapua'i i le Atua, ma le Upu o le Toe fa'amanatu a Mose a o sauni le atunu'u e sopoia le vai o le Ioritana.

O le fa'amanatu lea a Mose ina ia tumau le loto i le Atua ma avatu mea uma i le agaga ma le fa'amaoni, o le Atua lava o lo'o i ai lona afioaga e afio ai le Atua i le loto ma le agaga, ma ia manatu ia aua ona ifo atu i atua ese i ona luma. O le Upu atoa lea o lo'o ta'oto i tusitusiga a Mose i ana tusi e lima, o taiala ina ia savavali ai o lona nuu e tusa ma le manuia ua ia fa'amanuia mai.

O taiala ia ua fa'ailoa atu e le Lamepa i lenei tausaga fou, o le Upu a le Alii e ta'ita'ia ai la tatou savaliga i lenei tausaga. E taitoatasi ona manatumatu i nei fa'ata'ita'iga lelei ua fa'ailoa mai. O le tatalo, ia maua le agatonu o lana afioga e ta'ita'ia ai le savaliga i lenei tausaga. Ia manatua le Upu a le Alii, o le Upu ua liutino ia Keriso Iesu, o le manuia ma le ola e fa'avavau ia nofo fale ma avea ma faleapitaga o le Alii o i tatou loto i aso uma, a o feagai ma galuega i lenei tausaga.

I lenei masina ia Ianuari, aso sefulu ma le valu (1/18/2019), ua tatala aloa'ia ai le Fa'apaiaina o le Malumalu 'Ua Taunuu,' o le Malumalu o le Ekalesia i Kanana Fou. Na fa'atamaia e savili malolosi e potopoto ai le Ekale-

sia ma noanoamanū i talosaga ma le tapuaiga ma fonotaga, ma avatu vi'iga i le Atua ma lona suafa. O le fanoga o le Ekalesia ina ia toe fausia ma ia avea ma Malumalu lelei e afio ai le Atua, a o fa'apea ona tapua'i atu o ona tagata.

O lea ua taunu'u le fa'amoemoe o le Ekalesia, e pei foi o le Tupu o Solomona ina ua ma'ea le faia o le Malumalu o le Alii, ua paū mai le afi, ma le pupula a le Alii i luga o le fale, ona latou fa'apau faō ai lea i le paepae, ma latou ifo ma vivi'i atu i le Atua ma fa'apea atu, 'Auā e lelei o ia; auā e fa'avavau lava lona alofa'.

O fa'amatalaga uma a le Lamepa i lenei tusitusiga, o le a avatu lea o se tala fa'apitoa, e fa'ailoa atu ai i le Ekalesia le fausia o le Malumalu fa'apea ai ma le taunu'uga o le galuega, e pei ona aulia mai o lenei aso i le alofa o le Atua. Ia manuia tele feau ma galuega o loo feagai ai.

*L. Nu'usila Samuelu, FS
Fa'atonu, Lamepa*

.....Fa'afetai a le Ta'ita'ifono

Fa'aauau mai itulau 1

lava upu e fa'aleo ai le agaga fiafia, ae o loo sisila le Atua. Ua fa'amalo le onosa'i. Fa'afetai i le Ofisa Tutotonu, nofo a fa'atonu ma le 'au galulue, tainane le Lauaufono a le Fonotele, lau Susuga i le Sui-Ta'ita'ifono, le Loia Fautua, le Failautusi ma le Teutupe aoao a le Ekalesia. Ua fa'afetai le lava papale. Malo le fa'asoa ma taofiofi ina ia malu le afuliligi o le Ekalesia. Fa'afetai i le Mafutaga a Tina ma le Mafutaga a Tiakono o pou malolosi o le galuega. Ua gaogao a outou tu'ugaoa, ona o le silasila mamao ma moni le fa'atinoina o le alofa.

Fa'afetai i le Laumua, le Kolisi Fa'afai-feau i Kanana Fou, lau Susuga i le Peresetene, vasega o faiaoga, o a'oa'oa ma faletua, ua fa'amalo le fa'amama avega.

Fa'afetai i le Paramount Builders, i le matuaofaiva lau Susuga i le Faifeau Papali'i ma le falefa o lo outou aiga Sale'malama. Fa'afetai i le tofā poto, le silasila ma le tomai ua fa'atino ai le galuega. Ua fa'amalo fai o le faiva. O a fo'i ni gasū o le galuega, ia malu le vai i lou finagalo Atua.

Le ekalesia e, ne'i le soo lou titi ma le a'u lou pale i le taumafai atu, e galo i lalo nei, ae manino mea uma i luga. Ua outou fatuatia ma gapatia. Ua outou matitiva ona o le Atua ma le galuega. A ia outou manatua, o le Satauro manumalo o le Keriso Toetu, ua fa'atamaoiga ai lo outou matitiva. Ua malele le Ali'i e ou le ola ma le malosi uma lava, "Ua taunu'u, ua fai lenei mo oe." Ua totogi e le Ali'i Toetu au aitalafu. Ua fa'aolaina oe i lou fa'atuatua.

Soifua,

*Faaeteete Saifoloi FT
Ta'ita'ifono Fonotele EFKAS*

.....Fa'apaia Malumalu 'UA TAUNUU'

Sili, Michael P. Kruse. O sui o Matagaluega a le Faigamagalo sa fa'aoo atu ai foi le valaaulia e aofia ai: le Afioga i le Loia Sili ia Talauega Eleasalo Ale; le Fa'atonu o Mataupu Tau Samoa, le Afioga i le Maoputasi ia Mauga T. Asuega; le Fa'atonu o Galuega Lautele a le Malo, Faleosina Voight; ma le Afioga ia Pulu Ae Ae Jr, sa fai ma sui o le Ofisa a le Faipule i Uosigitone ia Aumua Amata Radewagen. Sa valaaulia fa'apitoa foi le Matuaofaiva, le Afioga ia Papalii Lauili Alofa, le pule sili a le kamupani o le Paramount Builders, sa feagai ma le galuega tele i le toe fa'aleleia o le malumalu.

O isi valaaulia fa'apitoa o lenei fa'amoemoe e aofia ai o tatou usoga i le EFKS. Sa malaga mai ai ma afiio mai ai le Lauaufono a le Fonotele EFKS; Tautiagi Senara FT, Ta'ita'ifono EFKS, ma o ia foi lea sa fai ma lauga fa'apitoa i le Sauniga Lotu; o Tunumosi Iosia FT, Sui-Ta'ita'ifono EFKS; Vavatau Taufao FS, Failautusi Aoa EFKS; ma Rimoni Wright FS, Teutupe EFKS. Sa valaaulia foi le Lauau o le Komiti a le 'Au Toeaina EFKS, lea sa malaga mai ai ma susu mai ai le Afioga i le Ta'ita'ifono a le KAT EFKS, Tavita Anesone FT; ma le Failautusi, Iosefa Uilelea FT. Sa 'auai mai foi le Afioga i le Tiakono Toeaina ia Senetenari Samau mai le Matagaluega Faasaleleaga, o ia lea sa fai ma fofoga o le 'au malaga mai le EFKS. O se fiafiaga ma se mitamitaga tele i lea aso, ina ua mafai ona 'auai mai o tatou usoga mai le EFKS, fa'atasi ai ma o latou faletua, e molimau fa'atasi lenei aso fa'amoemoeina.

E ui i le tele o le 'au valaaulia sa mafai ona fa'atasi mai, ae e i ai foi nisi o valaaulia sa le mafai ona 'auai mai, e pei o le Afioga i le Peresitene o le United Church of Christ (UCC), le Susuga i le Faifeau Foma'i ia John C. Dorhauer; ma le Fa'atonu Sili o le UCC Cornerstone, o Mrs. Maria Coyne. E le o toe po se silafia, o le faigapa'aga a le EFKAS ma le UCC na mafai ai ona maua le nonoga tupe e \$2,000,000.00 lea sa fa'atino ai le galuega i le malumalu. E ui e lei 'auai mai ia sui mamalu a le UCC, ae sa fa'ailoa mai o la alofaaga mo le EFKAS i lona aso fiafia, ma fa'amalulu mai ua le mafai ona 'auai mai. A o se tala fiafia, ua fa'ailoa mai lo la mana'o, e fia asiasi mai ma mafuta mai i le EFKAS i se taimi o i le lumanai.

E lagona ai le agaga fa'afetai ma le agaga vivii i le Atua, ina ua mafai ona fa'ataunuuna le fa'amoemoe a le Ekalesia. O le fa'amoemoe ua leva ona faupo fauao. Sa taumate foi i le ete pe tua ma ni a. A o le maualuga o le agalelei o le Atua ma le sului o ona fofoga alofa i luga o le Ekalesia ma lona fa'amoemoe i lea aso, na atagia i le to'atele o le Ekalesia EFKAS, fa'apea le paia ma le mamalu o le 'au valaaulia, sa fa'atumulia ai Kanana Fou i lea aso. O le a fa'ailo atu i lenei Lamepa, fuafuaga uma sa feagai ai i lea aso fa'amoemoeina.

Sāōga a Pulega

I tapenaga mo le fa'apaia o le malumalu 'UA TAUNUU,' sa tasi moemoe ai le finagalo a le Lauaufono a le Fonotele, le Komiti o Feau Esee, ma le Komiti o Tama a le Ekalesia; ina ia faia se saoga a Pulega uma a le EFKAS e fesoasoani ai mo le fa'amoemoe, aemaise o fa'aaloaloga mo le 'au valaaulia i le aso e fa'apaia ai le malumalu. O le saoga sa fa'ataoto mai ma sa fa'asalalau atu i le Lamepa o Setema-Oketopa 2018, e ta'i \$2,000.00 Pulega uma a le EFKAS (24), e maua ai le tino i tupu e \$48,000.00. Ae na o Pulega i Samoa nei (10), e le gata i le \$2,000.00, ae fa'apoopoo ai ma sua e ta'i 7 a le Pulega; e maua ai le aofai e 70 sua.

O le afiafi o le aso 15 o Ianuari i le maota o le Taeaofua o Tupulaga sa fa'atino ai lenei saoga. E ese foi le matagofie o le alofa o le Atua sa fa'aalia mo molimauina i lea afiafi, i le sagisagi fiafia mai o Pulega ta'itasi a le EFKAS e fai so latou sao mo le fa'amoemoe a le Ekalesia. O le saoga sa mafai ona fa'amaopoopo i lea afiafi:

Pulega Hawaii Sasa'e	— \$2,000.00	
Pulega Hawaii Sisifo	— \$2,000.00	
Pulega San Francisco	— \$2,000.00	
Pulega Santa Clara	— \$2,000.00	
Pulega LA Matu	— \$2,000.00	
Pulega LA Saute	— \$2,000.00	
Pulega Oceanside	— \$2,000.00	
Pulega USO	— \$2,000.00	
Pulega Seattle	— \$2,000.00	
Pulega Alaska Matu	— \$2,000.00	
Pulega Alaska Saute	— \$2,000.00	
Pulega Aukilani	— \$2,000.00	
Pulega Ueligitone	— \$2,000.00	
Pulega Sini/Ausetalia	— \$1,500.00	
Pulega Fale-Ta'u	— \$2,000.00	7 Sua
Pulega Fale-Luanuu	— \$2,000.00	7 Sua
Pulega Vaifanua	— \$2,000.00	7 Sua
Pulega Sa'ole	— \$2,000.00	7 Sua
Pulega Sua	— \$2,000.00	7 Sua
Pulega Fagalao	— \$2,000.00	7 Sua
Pulega Itu'au	— \$2,000.00	9 Sua
Pulega Tualauta & Leasina	— \$2,000.00	7 Sua
Pulega Tualatai & Aitulagi	— \$2,000.00	7 Sua
Pulega Fofa & Alataua	— \$2,000.00	10 Sua

O le aofai atoa o le saoga a Pulega sa mafai ona fa'amaopoopo i lea afiafi mo le fa'amoemoe o le fa'apaia o le malumalu 'UA TAUNUU': **\$47,500.00** le tino i tupe, ae **75 sua**. Fa'amalo fa'afetai i le mamalu o nofo a Pulega a le EFKAS, mo lea sao taua mo le fa'amoemoe.

Fesoasoani a le Mafutaga Aoao a Tina

E le mafai ona tuu i lalo pe fa'asee i tua le fesoasoani tele a le Mafutaga Aoao a Tina mo le fa'amoemoe a le Ekalesia i le fa'apaiaina o le malumalu 'UA TAUNUU'. E fa'apito 'augafa se fa'amatalaga ina ua mae'a le sauniga sa faia i le malumalu, ma ua aga'i atu le mamalu o le 'au valaaulia mo taumafataga fa'atasi ai ma fa'aaloaloga. O le taimi tonu lea sa iloa tino ai le sao a le Mafutaga Aoao a Tina mo le fa'amoemoe i lea aso.

O le masina o Setema 2018 na amata ai ona tapena le Laulafono a le Fonotele ma le Komiti o Feau Eseese mo le fa'apaiaina o le malumalu e faia i le aso 18 o Ianuari 2019. I nei tapenaga, ona o le vaivai a lima o le Ekalesia talu ai le galuega sa feagai ai, na ave ai le fa'atalosaga i le Ta'ita'ifono ma le mamalu o le Laulafono a le Mafutaga Aoao a Tina, pe a fa so latou finagalo, ae pe mafai ona saunia e le Mafutaga le taumafataga mo lea aso, e silia ma le 500 tagata o le a 'auai. Sa lagona lava le agaga fiafia i le Laulafono a le Fonotele ma le Komiti o Feau Eseese ina ua tali mai le Ta'ita'ifono ma le Laulau a le Mafutaga Aoao a Tina, o le a fa'apena ona latou fesoasoani mai.

Sa i ai le fuafuaga a le Komiti o Feau Eseese, na o le taumafataga o lea aso o le a tu'u atu i le Mafutaga Aoao a Tina. A o le fa'amoemoe atoa i lea aso pe a mae'a le sauniga i le malumalu, o le a fa'atino i le maota Taeaoafua o Tupulaga, ona o le tele o le nofoaga e fetau tonu ma le to'atele o le a 'auai mai i lea aso.

Ae peitai, toe 2 vaiaso fa'ataunuu le fa'amoemoe, ae maua mai le tala, e i ai galuega e manaomia ona toe faia e fa'aleleia ai le maota Taeaoafua o Tupulaga (tutulu ma fa'aletonu faleleta'ua). Ona o le utitui o le taimi, na toe ave ai le talosaga fa'avavevave a le Komiti o Feau Eseese i le Ta'ita'ifono ma le laulau a le Mafutaga Aoao a Tina, i le fa'aaogaina o le maota o Tina, fa'atasi ai ma lona tapenaina, e fa'ataoto atu i le Mafutaga latou te saunia. E ui i le itiiti o le taimi e faia ai ia tapenaga, ae sa tali fiafia mai lava le Ta'ita'ifono ma le laulau a le Mafutaga, e taoto atu latou te saunia.

E le gata sa gafa le Mafutaga Aoao a Tina ma le saunia o le taumafataga i lea aso, ae sa latou feagai foi ma le tapenaina o le maota ma teuteuga uma sa molimauina i lea aso. I le ma lea, sa saunia foi e le Mafutaga fa'asolo mo le mamalu o le 'au valaaulia sa 'auai, fa'atasi ai ma le keke e 50 fogafale, sa ofo alofa mai ai le Faletua o le Toeaina ia Rosalina Su'esu'e, ma le saunoaga a le Faletua, o lo la mea alofa fai fa'atasi lea ma le susuga i le Toeaina ia Su'esu'e Su'esu'e na aamia e le Atua i le 2017, mo le Ekalesia EFKAS ma lona aso fa'amoemoeina.

Ioe, o le matagofie ma le maualuga o lea aso ina ua mae'a le sauniga i le malumalu, na mafua ona o le fesoasoani tele a le Mafutaga Aoao a Tina. Fa'afetai!

Mea alofa a le EFKS

I le afiafi o le aso 17 o Ianuari a o feagai ai ma tapenaga fa'aiu e sauni ai mo le fa'apaiaina o le malumalu i le aso 18 e soso'o ai, na fesootai mai ai le Failautusi Aoao a le EFKS, le susuga i le faifeau ia Vavatau Taufao, ina ua taunuu manuia mai lo latou 'au malaga mai i Apia. O le fesootai mai o Taufao, e talosaga mai se taimi i le taeao a o lei amataina le sauniga o le fa'apaiaina o le malumalu, mo so latou avanoa e tau 'aao mai ai lo latou mea alofa e tusa ai ma le valaaulia. Talu ai o le sauniga sa fuafua e amata i le 10am i le taeao, na fa'aavanoa ai le itula e 9am mo le EFKS e tusa ai ma le fa'atalosaga mai.

O le 9am i le taeao i le aso 18 o Ianuari na to'ai taunuu mai ai le Sa o le EFKS i le laumua i Kanana Fou. Na taunuu mai ai le Laulafono a le Fonotele a le EFKS (Tautiaga Senara FT, Ta'ita'ifono; Tunumoso Iosia FT, Sui Ta'ita'ifono; Vavatau Taufao FS, Failautusi Aoao; Rimoni Wright FS, Teutupe), ma le Laulau a le Komiti a le 'Au Toeaina EFKS (Tavita Anesone FT, Ta'ita'ifono; Iosefa Uilelea FT, Failautusi), fa'atasi ai ma o latou faletua. O le afioga i le Tiakono Toeaina ia Senetenari Samau sa tu to'oto'o mo le 'au malaga a le EFKS, ma sa fofogaina la latou mea alofa.

O le Laulafono a le Fonotele a le EFKAS ma le Komiti o Feau Eseese sa talia le o'o mai o le EFKS. O le Afioga i le Ta'ita'i-Komiti a le Komiti o Feau Eseese, le tofa i le to'oto'o ia Le'i Sonny Thompson TK, sa fai ma fofoga o le EFKAS, e tali fuaitau i le saunoaga a le Tiakono Toeaina ma le 'au malaga a le EFKS.

E ese foi le mataina o lea taeao i sauniuniga ma tapenapenaga a le EFKS i le tau 'aaoina mai o lo latou mea alofa. I le maimoa atu i lea taeao, o tapenaga ma sauniuniga ia e masani ai le aganu'u i faiga o le ta'alolo. A o le tuualalo mai a le Failautusi Aoao ia Taufao, e le o se ta'alolo, a o le mea alofa a le EFKS mo le valaau fa'aaloalo atu o le EFKAS.

E 10 'ie toga tetele sa tapena mai e le EFKS, fa'atasi ai ma le latou mea alofa tupe: e \$20,000.00 le mea alofa a le Laulafono a le Fonotele EFKS, ae \$10,000.00 le mea alofa a le Laulau a le Komiti a le 'Au Toeaina EFKS; e maua ai le aofai, e **\$30,000.00**.

O fuafuaga uma ia sa fa'atino a o lei amataina le sauniga o le fa'apaiaina o le malumalu, ma ua silasila maimoa ai le Laulafono a le Fonotele EFKAS, le Komiti o Feau Eseese, fa'apea le mamalu o le Ekalesia ma le 'au valaaulia sa potopoto i lea taeao e tatali le amataina o le sauniga. Na saunoa le Afioga i le Ta'ita'i-Komiti ia Le'i e fa'afetaia le EFKS mo le mea alofa paia, fa'atasi ai ma le talosaga, o se taimi pe a mae'a le sauniga, ona fa'amaea atu lea o se fa'amatalaga a le EFKAS, ona e faigata le mea alofa tele lea ua opea nei i le laumua o Kanana Fou..

Taalolo a le afioaga o Leusoalii

Ina ua mae'a le tau 'aaoina mai o le mea alofa a le EFKS, sa sauniuni mai ai i tua le ta'alolo a le afioaga o Leusoalii, Samoa. O le 'auala mai o le ta'alolo, o le Afioga i le Ta'ita'ifono a le EFKAS ia Faaeteete Saifoloi FT ma le faletua ia Mina, o lupe fa'alele o le afioaga o Leusoalii. Na susu mai ai le Susuga i le Faafeagaiga ia Tanoalei'a Tunupopo ma le paia o le afioaga. O le paia lava lea e fa'asino i le Aiga o Mavaega, le nofo a Ituala, ma le Aumua o le Tuiatua, fa'apea le usoalii. O le tofa ia Maoga sa fai ma fofoga o le afioaga sa malaga mai.

O le fa'aaloalo mai o Leusoalii, sa tofusua le Laulau-fono o le EFKAS ma le tofa, fa'atasi ai ma 'ie toga tetele e 5 sa momoli mai, ae ufita'i i le **\$10,000.00**. Fetalai le Ta'ita'i-Komiti o le Komiti o Feau Eseese ia Le'i, e fa'afetaia le afioaga i lo latou agalelei ma le silasila i ana lupe fa'alele, i le Afioga i le Ta'ita'ifono ma le faletua. Na momoli aloa'ia ai foi le valaaulia i le Susuga i le Faafeagaiga ia Tunupopo ma le mamalu o le afioaga na malaga mai, e fa'atasi atu i le Maota o le Mafutaga Aoa o Tina pe a mae'a le sauniga, e fa'amae'a atu ai se fa'amatalaga a le EFKAS.

Sauniga o le Fa'apaiaina o le Malumalu 'UA TAUNUU'

Na talafeagai tonu le mae'a ai o le ta'alolo a le afioaga o Leusoalii ma le ta o le itula e 10am e amata ai le sauniga o le fa'apaiaina o le galuega i le toe fa'aleleia o le malumalu 'UA TAUNUU'. Na amata le sauniga i fafo o le fa'apaologa o le malumalu, a o alaala le mamalu o le Ekalesia ma le 'au valaaulia i fale 'ie sa fa'afesagai ma le fa'apaologa. Na amata i upu fa'afeiloai na saunoa i ai le Afioga i le Ta'ita'i-Komiti o le Komiti o Feau Eseese, ia Le'i Sonny Thompson TK.

Saunoaga Fa'afeiloai: Le'i Sonny Thompson TK

Ua tala mai e le lagi le mamalu ma le silisili ese o le Atua foafoa, ae fa'aalia e le va nimonimo le mamana mata'utia ma le silisili ese o lona mataisau. Ou te fa'atalofa ma fa'afeiloai atu i lenei taeao, aua ua sau le va'a na tau, tau mai le va'a na tiu, o loo mamau pea lago o le va'a o loo fao afolau. Lā to i le ea ma le lā to i le tai, i le afio mai o le Ekalesia i fata faitaulaga e fia i le lalolagi lea ua tatou feiloai i lenei taeao. Tulou, tulona lava.

Lele ua logo le naiatea, ua logo foi le nai ama, aua o lea ua faofale alii seu, ua fa'aifo foi le tuamafa fili malae, aua o le alofa o le Atua ma lona agalelei, i le fa'amoemoe sa fau ao fau po pe tua ma ni a, sa taumate foi i le ete, ae peitai ane o lea ua toe o ni nai itula, ona tatou ulufale lea i

le malumalu UA TAUNUU i le Laumua i Kanana Fou, e fai tapuaiga i ai le Ekalesia Faapotopotoga Kerisiano Amerika Samoa. Matou te fa'atulou, ma fa'afetai atu i lenei itula o le taeao.

Tulou le paia o le faigamalo, o lena ua afio mai le afioaga i le Kovana, Lolo Matalasi Moliga, ma le faletua, le tina o le atunuu, o le paia a lena i le lua faiga malo i le afio o le Lutena Kovana ma le faletua, ae tainane fa'auluuluga matagaluega o la oulua kapeneta.

Faatulou atu i le paia o le fonu, lena o loo afio ma lau afioaga i le Peresetene o le Senate, lau afioaga i le Tamaitai o le Ao, lau afioaga Gaoteote Palaie Tofau ma lou faletua. O paia na o le maota mauuluga, o loo afifio ai Senatoa ma tāmā o le atunuu. Matou te fa'atalofa foi i lau afioaga i le Fofoga Fetalai ma lou faletua, o le paia lena i le afifio o le maota sui i alii tofia mai afioaga ma alalafaga taitasi o si o tatou atunuu.

Ae e le mafai ona fa'agaloina malo fa'alotoifale i le afio mai o lau afioaga i le Maoputasi Mauga Tasi Asuega ma le masiofo, paia lena i le afifio o Kovana itumalo Tutuila ma Manua, fa'atulou atu i lenei taeao.

O paia o le aufaigaluega i lenei taeao i le au valaaulia fa'apitoa, lena e afio mai lau afioaga Bishop Brown, ta'ita'i o le Ekalesia Katoliko Roma Puleaga Samoa i Pago Pago; na foi e afio mai le afioaga i le Sea, Asi Tuisalega, Ekalesia Metotisi i Amerika Samoa. Susu foi lau susuga i le toeaina, Mao Asalele Ekalesia Faapotopotoga Iesu i Samoa. Susuga i le faifeau Sauleone Aigofie, Ta'ita'ifono a Ekalesia Kerisiano Soofa'atasi. O paia o le aufaigaluega tofofi, lea o loo afio atu le Ta'ita'ifono EFKAS, fa'apea foi le Sui-Ta'ita'i o le Ekalesia ma le laulauafono, Talofa lava. Fa'atalofa foi i le Ta'ita'ifono o le EFKS i o tatou motu tuaoi i Samoa, matou te fa'atalofa ma fa'atulou atu i le laulauafono ma le paia o le faigamalaga.

O lenei taeao e pei lava ona matou talanoa atu sa taumate i le ete pe tua ma ni a, ae talu ai o le alofa o le Atua ma lona agalelei, lea ua tatou oaoa ai i Faleseu, ma tatou sauni atu e fa'apaiaina le mila lena o le Atua ua maea ona toe fa'afou, fa'amalo fa'afetai.

Faatalofa foi i lau Susuga Papalii, le Matuaofaiva ma le aiga Salemalama, ma le faletua, fa'amalo fa'afetai. Faafetai onosai, fa'afetai galue, aua o lea ua iu ma le manuia e aunoa ma ni mala.

Mamalu o le au toeaiina, i le susu mai o lau susuga i le taitai, aemaise le komiti a le au toeaiina. Faatalofa foi i vaega eseese o le Ekalesia ma Komiti Tumau, mafutaga tina, mafutaga tiakono, o le lautele foi o le Ekalesia, aemaise le Laumua i Kanana Fou lau afioaga i le Peresetene, matou te fa'atalofa atu. Faatalofa atu i le sui o le tatou malo i Uosigitone, le tofa ia Aumua.

O le tatou polokalama i lenei taeao, matou te talitonu o le a fa'amalieina o outou loto e tusa foi

ma le taumafai o lau Ekalesia aua le malumalu e tapuai ai le Ekalesia aoao. E ui foi i faigata o le galuega i taimi ua mavae, laina timuia, sautia i le po ma laina i le ao, ae ua manuia mea uma i la outou tapuaiga mau. A o lenei itula o le a tuuina atu loa le polokalama i le Susuga i le Toeaina ia Fiti Aofia, o le Ta'ita'i o le Komiti a le Au Toeaina, e amataina le tatou polokalama, ona sosoo ai lava lea ma le tapuaiga. A mae'a, ona toe taumafai atu lea o se matou fa'amatalaga.

Ina ua mae'a upu fa'afeiloai e pei ona saunoa i ai le Ta'ita'i-Komiti o Feau Eseea ia Le'i Sonny Thompson, ona amata lea o le sauniga i fafo sa ta'ita'iina e le Susuga i le Toeaina ia Fiti Aofia, le Ta'ita'i-Komiti o le Komiti a le 'Au Toeaina EFKAS.

O le sauniga lea na tau 'aao ai le pemitā e fa'amaonia ai le pasia o le galuega o le malumalu, sa feagai ma le tama'itai Fa'atonu o Galuega Lautele a le Malo o Amerika Samoa, ia Faleosina Voight. O le sauniga foi lea sa o'oti ai ma le lipine o le malumalu, sa feagai ma le faletua o le Kovana Sili ia Cynthia Moliga; fa'atasi ai ma le tau 'aaoina o ki o le malumalu, sa tu'uina atu e le faletua o le Matuaofaiva, le Afioga ia Leota Wanda Alofa.

Upu Amata o le Sauniga i Fafo: Fiti Aofia FT

I le suafa o le Atua le Tama, le Alo, ma le Agaga Paia. "Afa'i e le atinae e le Alii le fale, e galulue fua i latou o e atinae. Afa'i e le leoleoina e le Alii le aai, e mataala fua i latou o e leoleo. Ua ou fiafia ina ua latou fai mai ia te au, tatou te o i le fale o le Alii. Ierusalemā e, e tutu o matou vae i ou faitotoa. Ona o le fale o le Alii lo tatou Atua ou te saili ai le manuia mo oe."

E fa'afetaia lava le alofa o le Atua lo tatou Tapaau i le lagi, seanoa lona alofa tunoa, a o se tatalo na fau ao fau po lea ua liutino. Goga i le Atua le viiga ma le fa'amanu ona o le Faaolataga ua taunuu...UA TAUNUU, o lana malelega mai le Satauro o le Alofa, a o le Tala Lelei ua tatou ola ai. Le Ekalesia Faapotopotoga Kerisiano Amerika Samoa la outou taulaga lea i le Atua.

Tau 'aaoina Pemitā Pasia o le Galuega:

Faleosina Voight, Fa'atonu o Galuega Lautele

Manaia le amataga o lenei tausaga fou, fa'apaiaina o le malumalu o le Atua, UA TAUNUU. Faafetai mo le avanoa. Ma lou fa'aaloalo tele ou te tulai atu ai ma le fa'aeteete, e fa'atauvaa le auauna, e le agatonu foi e fa'afeagai ma le mamalu ma le paia o le aofia. Tulou, tulou, tulona lava.

"O lenei e vaavaai ou mata ma liliu ou taliga i le tatalo e faia i lenei mea. Aua ou filifilia ma fa'apaiaina lenei fale ina ia i ai lou igoa e fa'avavau, e fa'asaga ai foi ou mata, ma lou loto i aso uma" (2 Nofoaiga 7:15-16).

Ua matagofie lenei taeao, i lou matagofie Tamā i lou alofa, o le ola ma le malosi, poto, atamai, agavaa ma mafaufauga lelei, o le onosai ma le loto maulalo o āu ia Tamā, sa tiu ai lenei fa'amoemoe mai lona amataga, seia oo ina pa ia mai lenei ituaso. O ai se e le vivii. O le viiga ia te oe e fa'avavau, fa'avavau lava.

Faafetai mo le galuega, ma lenei moemitiga. Faafetai tapena, sa outou uia ala o le tulafono e ala i lona pemitā mo lona fausiaina, o ata mo lona fausiaina, aemaise le agavaa ma metotia mo lona fausiaina. E tusa ai ma asi-asiga pasi fale a lenei matagaluega. Ou te fiafia e fa'aailoa atu, ua pasia le malumalu 'UA TAUNUU' ma ua mafai ona fa'aaoga, o lenei fa'amaoniaga, e ala lea i lenei tusi pasi lea o le a tuuina atu.

Ina ua o'oti le lipine ma mae'a le tau 'aaoina o ki, ona soloai lea o le mamalu o le 'au valaaulia ma le Ekalesia i totonu o le malumalu, mo le amataina o le sauniga tele. E mafai ona e maua le porokalama o le sauniga tele i le upega tafailagi: www.efkasonline.org. E mafai foi ona e maimoa i le sauniga atoa i le https://youtu.be/sqY_PzkrQqY.

O le Afioga i le Ta'ita'ifono, le susuga i le Toeaina ia Faateete Saifoloi sa fai ma ta'ita'i o le Sauniga tele i totonu o le malumalu. O le susuga i le Toeaina ia Mafutaga Faaleaoga mai le Pulega i Aukilani sa fofogaina le Afioga Paia a le Atua. O le susuga i le Toeaina ia Liona Thompson sa ofoina atu le taulaga tatalo. A o le Afioga i le Ta'ita'ifono o le EFKS, le susuga i le Toeaina ia Tautiaga Senara, sa fai ma lauga fa'apitoa o le aso i le folafolaina o le Tala Lelei. O le aufaipese tu'ufaatasi a le Pulega a Fofu ma Alataua, ma le aufaipese tu'ufaatasi a le Pulega a Ituau, sa saunia viiga o le Atua.

O le tala o le galuega sa saunia e le susuga i le Failautusi Aoa ia Nafatali Falealii FS, le susuga i le Teutupe ia Fiasili Puni E. Haleck TK, ma le Afioga i le Matuaofaiva ia Papalii Laulii Alofa. O le Afioga i le Peresitene o le Senate, le Afioga i le Tama'itai o le Ao ia Gaoteote P. Tofau, sa saunoa e fai ma sui o le Faigamalo o Amerika Samoa. Sa fa'atino foi le sauniga o le Fa'amanatuga, sa ta'ita'iina e le susuga i le Ta'ita'i ia Faateete Saifoloi. O to'a-12 tianokono mai i aufaipese a le Pulega Ituau ma le Pulega a Fofu ma Alataua sa tautuina le fa'amanatuga. Ina ua mae'a le sauniga, ona saunoa lea o le Failautusi Aoa e momoli le fa'afetai i le 'au fai lotu, ma valaau le mamalu o le 'au valaaulia e see atu i le Maota o le Mafutaga Aoa a Tina, mo le taumafataga ma fa'aaloaloga e masani ai, sa tapena e le Mafutaga ma le Komiti o Feau Eseea.

Tala o le Galuega:

Nafatali Falealii FS, Failautusi Aoao EFKAS

E tulai atu ma le ava. Ou te tautala foi ma le faaeteete i luma o lenei fa'apotopotoga mamalu. Ou te talitonu o lea ua mae'a paelago e le afioga i le Ta'ita'i Komiti o le Komiti o Feau Eseese, o paia ma mamalu o lea ua afifio ma papa 'aao i lenei taeao i totonu o le malumalu 'UA TAU-NUU'. O paia fa'ale-Ekalesia; o paia fa'ale-Malo; o paia fa'ale-atunuu; o le a le toe i ai se fa'amatalaga, leaga o le moana loloto e le soona 'au sulusulu i ai se va'a ne'i goto i le tai sua. Ae nuunuu atu ia i le 'au fueloloo o le atunuu, o loo latou gafa fa'amatua o faivaina paia na.

A o le ala o le tula'i, o se tala o le galuega. E mua-mua ona ou ta'utino atu, ou te lei i ai i le amataga mai o lenei galuega. Ae ona o le tulaga o tofiga, ua ou tapena ai se molimau e fa'avae i luga o fa'amaumauga ua fa'amaonia mai e le Komiti o Feau Eseese, sa mafai ona ou maua i le Ofisa o le Failautusi Aoao.

E tolu vaega o lenei tala. O le a ou molimau i mea taua sa tutupu, ma le aso na tutupu ai, i le afuafua mai o lenei galuega seia o'o mai i le aso. O le afioga i le Teutupe, le tina Tiakono ia Fiasili Puni E. Haleck, o le a molimau i le itu fa'aletupe o le galuega. A o le afioga i le matuaofaiva, le afioga ia Papalii, o le a molimau i le itu o le konekarate sa feagai ma lenei galuega. O le agaga, ina ia outou maua se ata atoatoa o lenei galuega, mai lava i lona amataga seia oo mai i le aso. A silasila ane i le porokalama, o lena o loo tau 'aao atu ai se ootoga o tala o le galuega e fa'avae i luga o aso fa'ailogaina.

Masalo a saili se mafuaaga na ala ai ona a'e se finagalo i le Ekalesia e fa'atino lenei galuega, e maua lea i le aso 19 o le masina o Fepuari 2017. O le aso lea na pauu ma fa'aleagaina ai tioata tetele i le itu i luma o le malumalu e savili malolosi. Sa talosagaina le Ofisa o Galuega Lautele i se latou sailiiliga i le tulaga o le malumalu, ma le vaega i luma lea sa fa'aleagaina ai tioata. Ae aumai le latou ripoti, faimai ua pala ivivi i le itu i totonu o taua-luga o le malumalu, ua fa'atamaia e manu iti fa'alafua (termites).

O Mati 22, 2017, na valaauina ai e le Ta'ita'ifono, le susuga i le Toeaina ia Eveni Mamoe, le Fonotele Fa'afuasei a le Ekalesia e talanoaina tulaga o le malumalu. Sa le faigofie lenei Fonotele Fa'afuasei. Sa 'autasi le Ekalesia e tatau ona faia le galuega i le malumalu. Ae sa fefaloa'i, poo le mea e tu'u i lalo le fale ae fau se malumalu fou, pe fai na'o le galuega o le fa'alelei i luga o le fausaga tuai se i ia. Na pasia le toe fa'alelei o le malumalu i luga o le fausaga tuai sa i ai.

Ona amata lea ona saili se alaga tupe e fa'atupe ai lenei fa'amoemoe. Sau se taimi ona saunoa atu lea o le Afioga i le Teutupe e fa'amanino ia tulaga. Ae ina ua

le alaga tupe, amata loa ona fa'asalalau le galuega i kamuta ma konekarate faufale ina ia fa'aoo mai a latou tauofoga mo le galuega.

Ianuari 21, 2018 na iloilo ai e le Komiti o Feau Eseese tauofoga uma sa fa'aoo mai, ma na filifilia ai le Afioga ia Papalii ma le Paramount Builders i lana tauofoga e \$450,000.00 e faia ai le malumalu.

Ianuari 31, 2018 na faia ai le sauniga lotu e amatalia ai le galuega. A o le aso na sosoo ai, Fepuari 1, na sainia ai le feagaiga ma le Paramount Builders latou te fa'atinoina le galuega i le toe fa'alelei o le malumalu i le 5 masina—amata ia Fepuari ae uma ia Iuni. O le fa'amoemoe, ia oo atu ia Iuni ua mae'a le galuega, e tapena ai le malumalu mo le Fonotele a le Ekalesia Aoao ia Iulai.

E ui i se naunau ina ia fa'amae'a le galuega mo le Fonotele a le Ekalesia Aoao ia Iulai, ae peitai, sa le o gatasi le futia ma le umele. O le amataga o le masani o Iulai a o amata ona tapena le Ekalesia mo lana fonotele, na silasila ai e le Laulaifono ma le Komiti o Feau Eseese, e le gafatia le malumalu mo le Fonotele. Ma, o le mafuaaga o le fa'aletonu, o le tuai ona taunuu mai materials mo le malumalu sa oka mai i fafo—e pei o beams, o apa, o nofoa ma moli.

Amata le Fonotele a le Ekalesia ia Iulai 14, 2018, na faia i le Maota o le Mafutaga Aoao a Tina, ma o le finagalo a le Ekalesia na fa'aalia i lea Fonotele, e tatau ona fa'amae'a lelei le galuega.

Iulai 31, 2018, i le mae'a ai o le Fonotele, na toe sainia ai le feagaiga fou ma le Paramount Builders e fa'aauau le galuega. O le autu ma le fa'amamafa o lea feagaiga, ina ia aloa'ia pea tuutuuga o le feagaiga sa sainia muamua, ma ia fai ia mae'a lelei le galuega, e fuafua e fa'apaia i le vaitau o le fono a Kamiti Tumau ia Ianuari, i le taimi e aofia mai ai le Ekalesia, aemaise o sui mai i atunuu i fafo.

O le aso la, lea ua tatou taunuu mai ai i le aso sa fuafua e fa'apaia ai le galuega. O le ata o le galuega lea sa fuafua mai i le amataga, o lea ua mae'a. A o isi tulaga e pei ona outou silasila ai i le itu i fafo e lei mae'a, o mea fa'aopoopo ia sa faia mo le fa'amatagofie atili o le malumalu. A o le ata lea sa fuafua ai le galuega i le amataga ma sainia i le feagaiga sa faia ma le Paramount Builders, o lea ua mae'a lelei.

E momoli atu ai le fa'afetai i lau Afioga i le Matuaofaiva, lau Afioga Papalii ma le 'aufaigaluega a le Paramount Builders. Faafetai le onosai. Faafetai i le lava papale. Faafetai i lou fa'amama avega mai i le Ekalesia. So'o se kamuta lava, e faigofie ia te ia le galuega e fou lona amataga, aua o le a gasolo le galuega i luga o le fa'avae, sa amata mai lava e ia.

A o le galuega o le toe fa'alelei o se mea sa amata e se isi tagata, aemaise pe afai e tele se

galuega fa'aleleia e manaomia ona fai, o galuega pito sili ia ona faigata i soo se kamuta.

O le mea lea e momoli atu ai le fa'afetai i lau Afioaga Papalii ma le 'aufaigaluega o le Paramount Builders, e aveai ai lo'u leo fa'atauva e fai ma sui o le EFKAS. O le tulaga o le galuega lea sa tatou malilie ai mai i le amataga, o lea ua mae'a.

Ia, sau se taimi ona fa'amae'a atu lea o se fa'amatalaga. A o se tala otooto lena o le galuega ma lona fa'agasologa, mai lava i le amataga, seia oo mai i le aso. Ma lo'u fa'aaloalo, fa'afetai.

Tala o le Galuega:

Fiasili Puni E. Haleck TK, Teutupe EFKAS

Ou te fa'atulou atu i le paia o le aofia i lenei taeao. Ua uma ona saunoa atu i latou e pae ulufanua le paia o le Ekalesia, aemaise foi malo o loo aofia i lenei malumalu, ma o le a ou le toe pai iai, nei sese se upu ona afaina lea, aua e le gafu taulimaina e lou nei tina, paia o lenei aso. Ae o le a ou taumafai e talatala atu se tulaga na ala ai ona tofia a'u, o le teutupe a le Ekalesia EFKAS—ua na o se tala otooto i le tau o le malumalu UA TAUNUU.

O le mea taua i se galuega ua fuafuaina, o le tau o le galuega, ae poo fea foi e fa'atupe mai ai, ona fa'aaoga lea, ae pe fia foi se tupe o le a fa'aaluina. O le a ou taumafai e talatala atu na o vaega ma otooto atu le tala. Ae mo le Ekalesia EFKAS, o le atoatoa o le tala atoa o le galuega, o le a tuuina lea i le tatou Lamepa i se taimi o i luma.

O le tupe na fa'atupeina ai le galuega, e lei mafia ona fa'atupeina le galuega i totonu o le tatou atunuu nei, ona e fai si taugata. Sa tapa atu i fafo i le UCC Cornerstone, ma o iina na talosagaina ai se vaega tupe, na maua mai ai le \$1,986,890.83. O le tupe lea na nono mai i le vaega lea o le UCC. Ua alu le galuega ma ua manaomia ai se seleni fa'asili.

Ina ua maea le fonotele a le EFKAS i le 2018, na pasia ai loa e le Ekalesia le 300 afe tala e fa'aopoopo aua le feagai ai ma le galuega o le falesa. A fa'apea e tuufa'atasi nei tupe e pei ona manatu ai e fai ai le galuega, o le aofai, \$2,282, 890.83. E pei a ona ou fai atu, ua na o se tala otooto o le galuega. E oo mai i le aso 17 Ianuari 2019, le aso ananafi, o loo galueina pea le galuega leni. Ma o le tupe atoa na alu e oo i le aso 17 Ianuari 2019, e \$2,173,854.25. Tupe lena mai le amataga o le galuega sei oo mai le aso ananafi. Afai e tagai i ai, o loo totoe se seleni. Ae pei ona saunoa le susuga i le Failautusi Aoao, o loo i ai ni mea laiti o loo fia fa'aumaina, ae o loo i ai le seleni o loo totoe mai mo leni fuafuaga.

O le tala otooto lena, ina ia silafia le tulaga ma le tau ua maea e oo mai i le aso 17 o Ianuari 2019. Faafetai tele mo le avanoa, ma ia manuia tele, Soifua.



LAUGA

Tautiaga Senara FT
Ta'ita'ifono EFKS



Fa'afetai i le ta'ita'i o le sauniga. E muamua lava ona paia le tafailagi o ao, aua e le faigofie lo tatou va tapuia ma lo tatou matai silisili ese. O lona paia ma lona mamalu e le mafai ona taea e so tatou gagana, poo agelu foi poo tagata. Ou te fa'atulou atu i le paia ma le mamalu o le aofia i lenei taeao, paia lava i nuu tetele, a o ni laufofola, aua ua mamalu le paia ua aofia i le tatou tapuaiga i lenei taeao. I le paia o lau Afioaga i le Ta'ita'ifono ma le Laulauafono a le Ekalesia Faapotopotoga Kerisiano Amerika Samoa. Lau afioaga i le Ta'ita'ifono ma le laulaufono a Tama, le komiti a le 'Au Toeaiina, ae fa'apea foi le aufaigaluega tofifi, susuga i fa'afeagaiga ma ekalesia eseese i le fataloa o le Tala Lelei, o loo punonou ma galulue ai, aua le tauasua o le ipu o le soifua. Faatulou atu foi i le laulau komiti tumau, fa'apea lau afioaga i le Peresitene ma le Laumua i Kanana Fou.

Ae a le faigamalo a Tutuila ma Manua, le afioaga i le Kovana Sili, Lutena kovana ma lau lua taupulega, le Peresetene o le Senate ma le Maota Maua, lau afioaga i le Fofoga Fetalai ma le Maota o Sui, lau afioaga i le Faamasino Sili, ma le vaega o Faamasinoga. Tulouna Sua ma le Vaifanua, Fofu ma Itulagi, Saole ma Saleaamua, ma upu i le launiu na saelua. Tulou le laau na amotasi, Faatui ma le auvaa o Tootoo o le Faleula ma Tama a le Manuatele, o paia ia ma mamalu e le toe tau fa'amatieina i sau tala, aua o lea ua uma tapue i mavaega ua lalafa foi i faia e le toe sagolegole i ai se tasi, tau a ina ou sau i le va, aua ua maua leni taeao ua matagofie leni fa'amoemoe lea ua tatou o mai ai. Ou te fa'atulou atu ai.

O sina upu e fesoasoani i le agaga o leni aso... "A o e fa'atalitali i le Alii e fa'afuina lo latou malosi." Manatu e fia fa'ataua: "E le o le malosi, e le o le fitafita, ao le Agaga o le Alii ua taunuu ai."

O le fa'agasologa o le soifuaga ua tatou masani ai, e i ai taimi e feseetai ai o tatou lagona, e agai i luma, e agai ifo foi i lalo, taimi o le fiafia, taimi o le fa'anoanoa, taimi ua lelei, taimi ua le lelei ua vaivai, maua le fa'amanuaga, ia poo le fiu foi e saili e leai se manuia e tau lalata mai. A o le tele lava o taimi, o le tulaga e sili ona manaomia, o le i ai o le malosi tatou te fa'aaau ai ma le manuia mai le isi aso, ina ia taunuu manuia ai i le isi aso, e ui e i ai le alu i luga, feseetai foi agai i lalo, a o le mea sili ona taua, o le i ai o le malosi e tumau ma agai ai pea i luma. E fa'apena le olaga ua tatou masani ai.

Manaia le talenia ma le agavaa o soo se tagata i soo se taaloga, vave le oso saosaoa, a o le masani a le atunuu, fa'a

toatele ā e patipati i le tagata muamua taunuu i le tini. Tauga ma aoga le atamai, o le lelei aoaoina i soo se tagata fa'atoa amata i se galuega, a tatou molimau, e ese le mataalia, a tatou le fa'atafa ai, tatou te solia i le saosaoa i le tele o taimi, usu i le taeao tuai ona alu i le fale i le afiafi, ae alualu aso ma tausaga, tatou vaai foi lea ua amata ona tuai, sosoo ma le fa'anoi ua ma'i, fa'anoi i le maliu, ia ma alu atu a ma le toatele o aiga ua maliliu, seia oo ina fa'amavae. O uiga ia ua masani ai tatou. Soo se galuega, e oo foi i le avefa ma faifeau, faifeau e fou i le galuega e le misi i mea fai a le pulega e toaaga i mea fai a le Matagaluega a o le Ekalesia, ae e i ai taimi tatou te toe saili atu, ae leiloa poo fea ua i ai, la ua malaga i atunuu e mamao, e lei oo i le taimi e tatau ai ona malolo, a o la ua malaga fa'afia i fafo i fa'alavelave a le aiga o le faletua.

E taua tele lo tatou naunau ina i ai se malosia lea tatou te tumau ai i se mea lelei, ia aveese ai le fiu gofie, ae agai pea i luma ina ia taunuu o tatou fa'amoemoe. Manaia le i ai o le alofa fa'aleuo, molimau i ai, aemaise o tupulaga o nei aso. Ae e le mafai e le ituaiga alofa lea ona fau ai se aiga mautu, e le mafai ona fausia ai se mafutaga e tumau ina ia umi se mafutaga o fiafia pea, tatou te manaomia se mea sili ona taua, e manaomia pea le onosai, le fa'amaoni o le fa'apalepale, o le alofa fa'amaoni, loto fa'amagalo, mea ia e taua, tatou te maua ai le malosia e fa'aauu ai.

Soo se galuega e pei foi o lena galuega lea ua molimau i ai UA TAUNUU, e amata e alu i le atoa, tatou te fiafia e amata se mea. A o le fesili e tulai mai pea, E mafai ona tumau ai le fiafia? E mafai ona tumau ai le naunau ina ia fa'aauu le galuega? E mafai ona tumau le malosia seia oo ina taunuu? Aua e i ai le taimi tatou te iloa ai ua le o lea. E pei a o le tagata fa'atoa talia Iesu ma fa'aolaina. E le mapu le fa'aneene ma talai ma vivii i le Atua i taimi uma, ese le manaia ae fa'apena uma i tatou. Ae a leai se malosia e tumau ai, tatou te toe fiu e vaai i le isi taimi ua leai.

O le olaga ua fa'aolaina, e le o se olaga ua faigofie mo i tatou ua masani ai. Aua o le atili malosia lena o faiga a Satani e taumafai e fa'aleaga o tatou olaga. O le fai o i tatou ma tagata o le malo le Atua, o le valaauina fa'atasi lea oi tatou ina ia tatou tau mo Iesu i aso uma o lo tatou ola. Ia ao fea e maua mai ai le malosia lea...

Fai mai Isaia... Ao e fa'atalitali i le Alii e toe fa'afuina lo latou malosia. A o i tatou e le fiafia i lena mea o le fa'atalitali, 'aua tatou te manaia ia fa'atopetope se mea ae sei fai se malologa. Maua tatou i le vaivaiga o le fiafia puupuu. O le musu gofie, o le lava onosai, e le fia umi o tu i se kiu, e le o fia umi foi o tu se taavale i moli mumu, tatou te naunau ia fa'aalulau ma ia vave ona fa'ataunuu o tatou fa'amoemoe, pei e le o se mea lelei lea mo i tatou. Ae tatou te talitonu, e le o le uiga lea o le upu fa'atalitali. E le o le ogatotonu lea ua aumai i le fa'ataua o le fa'atalitali.

O le fa'atalitali i le Alii, o le mataala i le fa'aaogaina o

le avanoa e te galue ai i soo se fa'amoemoe lelei ma le maunitino, e le mafai e le silisili ese o le Atua ona tuulafoai i tatou i mea e le oo i ai lo tatou malosia. A tatou fa'atalitali i le Alii, sauni fiafia soo o Iesu e o e fai soo se mea e finagalo ai lo latou matai. Ua olioli livaliva ona o le toe tu manumalo o le Alii, pau a le mea lea e fa'atali i ai, sei saunoa mai. Ae fetali Iesu, o e fa'atali i Ierusalem le Agaga Paia e afio ifo ia te outou. Mafuaaga latou te le mafai ona fai le galuega sei vagana ua i ai fa'atasi ma le fesoasoani a le Agaga Paia. O le malosia lava lea e tasi lea tatou te molimau e mamanuina ai le galuega talai a le Feagaiga Tuai fa'asolo mai ai i le Feagaiga Fou e fa'amalosia le fa'asalalauina o le Tala Lelei, lea foi e unaina o tatou loto ma finagalo ma fa'amoemoe o le au kerisiano i nei ona po ina ia tatou tauivi ma taumafai ina ia taunuu o tatou fa'amoemoe. O le alaga fa'amalosia 'au e le mafai ona aveesea i ai tatou, ia outou galulue. Aua e pei ona fetali le Atua i ana Perofeta, "Aua o au ou te ia te outou."

Faatali le ausoo i Ierusalem, ae lei mapu le tatalo, e lei malolo i le aoa atu, e lei o ese ma le fiafia e mafuta fa'atasi, talatalanoa, fesufiai, o le a le mea e tatau ona fai, o a mea e foia ai le fa'afitauli o le galuega fou. Faatali a ma le fiafia ma le lē fefefe ma le maunitino, o le mana o le Agaga Paia, o le a maua ai e i latou le malosia. E le toe popole ai i ni Kaisara. E le toe popole ai i ni lafoga. E le toe popole ai foi i se malosia o Roma. Lea na amata i le au aposetolo. Amata a ia Setefano, le galuega tele sa feagai ma i latou, lea ua tatou aeae ai i nei ona po, e agai pea i luma i le faia o mea lelei, e manuia ai soo se fa'amoemoe.

O loo tatou ola ma soifua i se lalolagi e ese le malosia lea ua tatou fa'amoemoe i ai. E le tafa tasi i se atunuu, soo se tagata, ua sili tagata i le malosia faale-lalolagi e manuia ai, e tali ai ona manaoga, sei foia ai le tele o faafitauli ua feagai ma i tatou i nei ona po. O lea lava ua tatou molimau i ai, i le leai o se faamalieina atoatoa e maua ai, ma alualu ai lava i luma tuinanau e le faamalieina, seia oo ina leiloa poo fea e agai i ai, a o fea foi e taofi mai ai. Lea ua alualu le tele i le fa'aleagaina o le lalolagi a le Atua na fai, lea foi ua tatou fa'alogi o tala, ua oo lava i le malosia fa'amaneta o le potu o loo fa'avae ai le lalolagi o loo e soifua ma ola ai, e taofi ai le toulu ese o mea o loo taofi ai mea o loo fausia ai le lalolagi ma le paneta, lea ua tau sue poo fea o feseetai i ai.

Tatou te le o fia oo i ia tulaga, ae fa'afetai, fa'afetai i le Atua, lea ua e silafia ma o tatou iloa suiga lea ua oo i ai le lalolagi i nei ona po. Ua faigofie ona toe talanoa ma fesootai malo, aemaise o ta'ita'i i latou e pei e foliga o loo pulea le lalolagi ma taumafai e pule i le lalolagi ma mea na fai e le Atua. Lea ua tatou vaaia ua afaina le lalolagi o tatou o ola ai. Ua lamatia le soifua o tagata, a o lea lava tatou te ffilemu i le talitonuga o le galuega lea a le Agaga o le Atua, lea suia lagona o tagata ia fulitua i tuinanau o le lalolagi aua na o le malaia e iu i ai. O a'oa'oga o loo fa'afai

lele ma fa'asalalau atu ai, lea e pei ona tatou fausia ai maota e pei foi o lenei galuega tele. O loo faia foi i maota uma, falesa uma o loo tapuai ai fanau a le Atua. Tatou te molimau atu, leai la e le o le fitafita, e le o le malosi, a o lou Agaga, ua fetalai mai ai le Alii o au.

Tatou te le toe popole ai foi, aua ou te iloa e tutusa pau ai tatou, Samoa i Sisifo ma Sasae, i le faitioina o galuega tetele fa'apenei fai mai ua matitiva tagata, ae o lea tatou te molimau, o la e fausia a isi galuega tetele, fale tetele, o fale foi e tautua ai le atunuu ma e i ai foi lo latou taua, o fale faigaluega, o maota nofo totogi, fale e gaosi ai mea e lelei ai le taumafa a tagata (supamarket). Ae tele ina galo i ai tatou, e le nao mea ai e ola ai le tagata, a o afioga uma e tulei mai fofoga o le Atua, lea e puaina mai totonu o malumu o loo tapuai ai le au fa'atutua i lea aso sa ma lea aso sa.

Lenei galuega matagofie ua outou fai, le paia o le Ekalesia, talitonu e pei ona tele saunoaga o lenei taeo, fa'afitauli e pei ona ui mai ai, a o lea lava ua soifua manuia le laau o lou fa'amoemoe ma lo tatou fa'amoemoe, lea ua taunuu. Le fa'amoemoe sa lupe, fea se aso, fea se itula, lea ua tatou vaai i le matagofie o le fa'aali mai o le Alii. Na saili le tofa, na saili le moe ae fagagasua, a lea ua e silasila i le mauga o le Atua, lea ua tatou tepa i ula i le mataogfie o le fa'aali mai o le Atua mo oe i ou aao mafola ua faia ai le galuega. 'Aua ia nei i ai tatou, ae ia tuuina atu le viiga i le Atua ona o lona alofa ma lona fa'amaoni.

Ioe le Ekalesia e, Faapotopotoga Kerisiano Amerika Samoa, le uso tuofe, lea ua tu le faila le mauga o le Atua, sa e laina ma timuia ai. Faamalo le galulue, fa'amalo le le fa'alogologo tiga. Malo le loto Ekalesia, malo le loto tetele. Faafetai tautua i le Atua ma lana galuega. O le tatalo a lenei aofia ma i tatou uma ua potopoto mai, ia fai lenei galuega ma punavai o fa'amanuiaga fa'aleagaga e utuvai ma fa'amalie ai le galala o soo se tagata, ua fia maua le ola i Afioga Paia a le Atua, ina ia tupu ma ola le malo le Atua, a ia viia ai lona suafa, nei, e fa'avavau, fa'avavau lava. Manuia tele lo tatou aso fiasia.. UA TAUNUU. Faafetai i lau susuga i le taitai mo le avanoa....Soifua ma ia manuia.



LAUGA

Faaeteete Saifoloi FT
Ta'ita'ifono EFKAS



Ua tu to'oto'o lou aso fiasia le Ekalesia Fa'apotopotoga Kerisiano i Amerika Samoa, aua le fa'apaiaina ma le umusaina o lou falesa, UA TAUNUU. E mua'i fa'afetai i le Susuga i le Toeaina ia Fiti Aofia, le Ta'ita'ifono a le

Komiti a le 'Au Toeaina mo le sauniga amata e tatala aloaia ai faitotoa o le falesa. O le 'au mau tofi o le Sauniga, i Susuga i Toeaina ia Mafutaga Fa'aleaoga mo le faitauina o le Tusi Paia, ma le susuga i le Toeaina ia Liona Thompson mo talosaga.

E fia fa'amauiina foi le agaga fa'afetai i lana Afioga i le Masiofo o le Ali'i Kovana ia Cynthia Moliga mo le ootiina o le lipine o le falesa. Ia fa'amanuia tele le Atua mo galuega ua tapena i ai.

O lea foi ua fa'amanuia mai ta'ita'i o le atunu'u ma le malo o Amerika Samoa, e ala i le tofa fa'alele i lana Afioga, o le Peresetene o le Maota Mauuluga, le Tama'itai o le Ao ia Gaoteote Palaie Tofau, o le fofoga tau molimoli ma le saunoaga lava lea i lana Afioga i le Kovana Sili o Amerika Samoa, le tofa i le to'oto'o, Lolo Matalasi Moliga, tainane le tafatolu o le faiga malo o Amerika Samoa, i le affio o le Maota Mauuluga ma le Maota o Sui, le maota o Fa'amasinoga ma le fa'amalosi Tulafono, fa'apea le Ofisa o Mataupu Tau Samoa. Tulouna ia, Tulouna lava.

O lea foi ua taoto i maotaga le fa'alelegafulu o le Tala Lelei, a o se finagalo alofa o le Atua e fa'aleo ai fa'amanuiaga ma alofaaga mai le li'o o Ekalesia Kerisiano So'o Fa'atasi uma i so'o se fata faitaulaga e le gata i le Faleagafulu, a o lo tatou Usoga ia Tumua ma Pule. Tulouna lava.

Malo le malele. Ua tautai a'e le fa'atautaiga i le to'oto'o poo le lauga filifilia o le aso, i lau susuga i le Toeaina Tautiaga Senara. O le lauga na aami mai lagi aua ituaso fa'apenei. A o le to'oto'o foi ma le lauga o loo tausia malae e fia o le Faleoaana ma Tua o Maauga, e affio ai le Aiga Tauaana ma le latou tama, galu e fa ma tula o Salogo ma upu i le Falelatai, ae tainane malae tausii o le fautagatagi aua le Ekalesia Fa'apotopotoga Kerisiano i Samoa. Manusina le soa le saunoaga ma le tuleiga i lau susuga i le Toeaina Senara, a o le Ta'ita'ifono o le Fono Tele a le Ekalesia Fa'apotopotoga Kerisiano i Samoa. E le tau seselu atu, ma e le tau sulaina foi le toga lelei. Soo se galuega saunia lelei e leotele ma agiagia i le vasa loloa. Ia foi le mau e tele, ma ia fa'aifo manu mai lagi, aua tofiga ma le valaauina. Ia saga viia pea le Atua i galuega lelei mo le nei aso fiasia, ma ia i ai pea le alofa, le manuia ma le filemu o le Atua i soo se mea mo lou aso fiasia...le EFKAS.

Na o lenei le Ekalesia paia e, e lima lava nai a'u upu e fofola atu ai le agaga fa'afetai, le agaga fa'amalosi, ma fa'amanuiaga i lenei galuega tele. Tusi o le Feagaiga Tuai, II Tupu 5:6, o loo i ai upu nei: **"Aue! le Ali'i e, o le mea nono.."** Autu o Manatu: **"O lou fale sa nono i le Ali'i, ma lou fale sa nono manu i le Ali'i"**

Pe sa nono i le Ali'i le fale, pe sa nono manu i le Ali'i lou fale, le Ekalesia, o lea lava ua to pule le Alofa Tunoa o le Atuai lou falesa; UA TAUNUU, o le fale o le fa'autugatagi aua Kanana Fou ma le misiona tala'i a le Ekalesia Faa-

Fa'aaauu itulau 11

potopotoga Kerisiano i Amerika Samoa. Ua tini lau o le fa'amoemoe, ma o le fa'amoemoe foi ua taunu'u, o le la'au lea o le soifua. Ua tu le faila, a o le Ala ma le Mila sa nono ma nono manu i le Ali'i. Maifea? Aisea lava ua tu ai lenei falesa manaia ma le taugata? O le tali: E mai i le Tunoa o le Alofa o le Atua. Pe sa nono, ma nono manu i le Ali'i lenei falesa, ua fa'aalia lava le Alofa Tunoa o le Atua.

O le finagalo fa'aalualu mamao o le Atua ia fausia ia se malumalu po'o se falesa e tapua'i tasi i ai lona o nu'u o Isaraelu i Ierusalem. E lei faigofie ona fa'ataunu'u lenei miti. Ua peiseai e ataata mai, o se galu na ona fa'afua ae le fati. Sa loto i ai nisi ia faia loa. A o nisi lava foi, sa fa'atautau, ma o le ala lea sa fa'ataoto ai pea ma toe moe le toa, atonu e fai aso le Atua. E sau malama mo nisi augatupulaga mulimuli mai, ona faia lea o le mea e finagalo i ai le Atua. O le mataupu la i le malumalu po'ole falesa mo Isaraelu i Ierusalem, o se fa'amoemoe sa nono, ma nono manu i le Atua, ina ia le' moemoenoa, a ia moe alaala i ai le tofa ma le moe i le 'au puputoa ma tulatoa o le nu'u o Isaraelu.

Tula'i mai Tavita e fai ma tupu o Isaraelu, ua uma ona taimi ae leai se falesa. Ua uma atu Tavita, ae fa'apaleina lona atali'i o Solomona i le nofoa o le malo o Isaraelu. Ua fai e Solomona le malumalu e gata mai ai malumalu. Ua matagofie le galuega ae ua taugata le falesa. Paga lea, e le' fa'avavau se tagata i le nofoa. Ua uma atu Solomona le tupu, ae tula'i mai lona atali'i fouvale o Reopoamo e fai ma tupu ia Isaraelu. Ua gapatia ma fatuatia le malo ona o le taugata o le falesa ma le tau o le soifuaga ua o'o i ai. O le ala lea na tu to'oto'o ai le atunu'u ma le malo e faufautua ma tu'ualalo i le tupu o Reopoamo.

Reopoamo, ia aua nei pei oe o lou tama' o Solomona, sa fa'ae'e i o matou tua avega mamafa e fano ma leaga ai. A i ai ni alofa, se'i e manatu ane lava, fa'amama le sausu. Ua mamafa le avega o tauasoa. E lei tuu 'aulafo Reopoamo i le fa'atoga ma le aioi a le atunu'u ma le malo. O le maitau a le malo o Isaraelu, ua sili atu le saua o Reopoamo nai lo lona tuua o Solomona, ma o isi ia mafuaaga maumaututu o le vaeluina o le malo o Isaraelu.

Talofa e Isaraelu, le nuu tofia o le Atua, ua tu le falesa, a ua vaeluina le malo. Le fale sa nono ma nono manu i le Atua. Ua malepe le anoafale sa mo'omo'o ia maopoopo i le Atua. O le malepe o le malo, o le oia lava lea o sootaga ma tuaoi fa'ale-tagata, aiga, nu'u, le malo, a ua o'o lava i Ekalesia ma le Tala Lelei. Ua tala le va ma ua fa'atautava' ona fai tiute ma galuega, o le uso i le uso, o tino ma aano ua fefulituaai ma fetaua'i. Ua saili i le tao ma le uatogi mataupu e manuia ai.

Le Ekalesia, ia le o palapala a malo, a ia saili malo lou fale sa nono ma nono manu ai i le Atua. Tula'i mai Iero-poamo e ta'ita'i Isaraelu ma lona malo i matu e aofia ai ituaiga e 10 o Isaraelu, ae alo ane Reopoamo e fausia le

malo o Iuta i saute, e aofia ai ituaiga e 2 o Iuta ma Peni-mina. Ma, o le vaiata sa matua pa'u maualalo ai le soifua fa'ale-Agaga ma le ola tapua'i o tagata, le nu'u o Isaraelu i le Atua. Sa matua gaua'i ia Paala ma ifo i tupua, ma ua matua fiafia e fa'aloloto i le agasala.

O le vaiata lenei na toe fa'aolaola ai le toe fausia o fata faitaulaga sa tapua'i ai Isaraelu a o sopoia le vaomatua i tausaga e 40. O le malelega a le tupu o Reopoamo, le tupu o sa Iuta, a e le tapua'i i Siona le a'ai paia o Ierusalem, e le o oe o se Isaraelu moni. Ua na o Ierusalem e maua i ai le Atua o Isaraelu.

A o le poloaiga a Iero-poamo le tupu o Isaraelu, a e le saofia i Ierusalem ma Siona le a'ai paia, alo oe e te tapua'i i lou fata faitaulaga. A mu ma manogi au taulaga i ou fata faitaulaga, e te maua fo'i i'ina le alofa o le Atua o Isaraelu. E le na o Ierusalem e afio fa'atupu ai le Atua. Ia toe fausia ma fa'aolaola fata faitaulaga i Peteli, Tanu, Kilikala, Sekema, Sailo ma Ieriko fo'i, pei o le tala II Tupu 5:6 o lo'o i ai le matua nei, **Aue! le Ali'i e, o le mea nono.**

O le au soo o le perofeta o Elisaia, sa maua le agaga o le Atua i le faia o galuega lelei ina ia toe liliu ta'ita'i o le malo ma tagata i le Atua. Ua tupu lauolaola le galuega i Ieriko. Ua to'atele tagata, a ua pumo'omo'o ma vaapiapi le fale e tapua'i ai. E tu fo'i le fale, a ua oia. O le ala lea o le saili o le nu'u e toe fausia se isi galuega fou. Peita'i, e le' faigofie, e ausage ma matitiva. O le tala ua maua, e nono mea uma o le galuega e o'o a i laau e fau ai le fale, e nono, o le samala, o le ko'i, o le ili, o mea faigaluega, o le ola ma le taimi, ua lafoa'i lava i le Atua.

O le mativa i le Atua ma le galuega, o le tele fo'i lena o lona lava alofa tunoa tele. E silafia ma fa'afofoga le Atua i lo tatou aioi ma le uio, o le tagisa ma le fa'atauanau, ma e to pule pea le Alofa Tunoa o le Atua. Pe tautua ma tapua'i i Ierusalem le a'ai Paia, e taugata lava le fai ma so'o o Keriso. Pe tautua ma tapua'i mai nu'u mamao, aulotu tetele pe laiti fo'i e pei o Peteli, Tanu, po'o Ieriko fo'i, e te maosiosi ma manu'anu'a lava ona o le Satauro o Keriso. O le ola e nono ma nono manu i le Atua, e fa'afau-pu'e e le Atua ona manuia.

Ne'i o tatou masalosalo i le Tunoa o le Alofa o le Atua. Ioe, le Ekalesia e. O le Atua sa **seu sisila** i le Ekalesia a o uio ma fa'atagisia Lauulu se va'a ia goto. O le Ekalesiasa fa'anoinoi ma fa'aoololomaau i le Atua mo lana fa'asoa. O le Ekalesia sa le vaioa le maasiasi a ua savalia ala o le mativa. Sa aoao lava ma'a ona o le lima vaivai ma le le tagolima. Ua a nei? Ua tu le falesa. Ua tali le alofa tunoa o le Atua i lau aioi. Le Ekalesia, ia fa'afetaia le Atua i lona aao mafola, ua le tuua se mea se tasi, a ua falute atu ona manuia sautualasi ona o lou soifua nono i le Atua. E le mativa pe gaogao le Atua i lona lava Alofa Tunoa tele.

O le Atua sa **fa'afofoga** i le Ekalesia, a o ifo ma punonou i talosaga ina ia ulimasao le....

galuega. E lei faigofie tiute sa feagai ai. Fai fo'i o le uta a le agaiotupu ma lona aiga, a o le uta a le taufalemau ma le tapuaiga. O le a'ea'e ma le ifoifo. O le laina ma le timuia. Tele le fili sa lamatia, anoanoa'i faitioga, sa tau fo'i le pua ma lafo.

Pe'ita'i ane, sa tata lava i le moa o le ala ina ia mau pea le to'ovae, aua o le Atua e le mavae lona Alofa i le Ekalesia e finafinau i le Tatalo. O le Atua sa fa'afogaina loimata o au talosaga i le po ma le ao, ao ma le po. Le Ekalesia sa po le fala ma feula le mulila, sa tapuai nonofo, sa tapuai gugu, sa tapua'i tula'i ma savavali, ma tu'u mai outou tau'au, pe sa susu'e fo'i le fa'amalama ma tilotilo mai i lau Kanana Fou na e fanau ai ma fa'afailele o ta ola fa'auauna o le Tala Lelei. E le sili le ta'i nai lo le tapua'i. Malo tatalo.

Le Ekalesia, o lea lava ua tu le galuega ona o lau tau alaga ma le fa'atauanau i le Atua. O le falesa sa nono ma nono manu ai i le Atua. UA TAUNUU, o lea ua to manu mai lagi. Fa'afetai faitaulaga. Fa'amalo le taupati ma tausinio. Ia fa'amanuia le Atua i lou a'ao foa'i i so'o se ala. Fa'atutumu au tu'ugaolua ua fa'amaimau ma toesea.

Ne'i galo, o le Satauro manumalo o Keriso, e le se mea nono pe fa'atauanau. A o le mea foa'i fuaina mai i le Alofa Tunoa o le Atua. O le mea na toina mai le fatu o le Keriso Toetu ina ia mana lau misiona tala'i le Ekalesia. Ua Taunu'u! Ua magalo au agasala. Ua totogi e le Ali'i Toetu au aitalafu. Pe sa nono ma nono manu i le Ali'i lou fale, e silisili ese lava le Alofa Tunoa o le Atua.

Ia manuia le fa'afulafaleina o lou falesa UA TAUNUU. Ia fai ma fale e afio tumau ai le Atua mo le Ekalesia Fa'apopotoga Kerisiano i Amerika Samoa. Amene.

Mea Alofa mo le 'UA TAUNUU'

Ofo mo le Malumalu:

Faaeteete & Mina Saifoloi..... <i>Ta'ita'ifono EFKAS</i>	Tusi Paia & Pese
Eveni & Leumeke Mamoe ma le fanau..... <i>Toaina Penisione</i>	Pulelaa
Fiasili Puni E. Haleck ma le fanau..... <i>Teutupe EFKAS</i>	Moli Teuteu <i>(Chandelier)</i>
Nafatali & Lipine Falealii..... <i>Failautusi Aoao EFKAS</i>	Tusi Paia, Pese & Moli mo le Pulelaa
Mafutaga Tina Tiakono, Faletua o Tiakono, ma Tama'itai Tiakono	Ipu Faamanatuga

Fesoasoani mo le Galuega:

UCC Pension Board..... <i>Mr. Brian Bodager, CEO</i>	\$10,000.00
Rev. Dr. Iese Tuuao..... <i>Nanakuli First Samoan Church of Hawaii (LMS)</i>	\$5,000.00
UCC Hawaii Conference..... <i>Rev. Gabrielle Chavez, Conference Minister</i>	\$1,000.00
John & Marlene Fotuaika.....	\$1,000.00
Mafutaga Aoao a Tiakono EFKAS.....	\$150,000.00
Mafutaga Aoao a Tina EFKAS.....	\$50,000.00

Mea Alofa ma Taulaga:

Laulaufono EFKS..... <i>Tautiaga Senara FT, Ta'ita'ifono; Tunumoso Iosia FT, Sui-Ta'ita'ifono; Vavatau Taufao FS, Failautusi Aoao; Rimoni Wright FS, Teutupe</i>	\$20,000.00
Laulaufono EFKS KAT..... <i>Tavita Anesone FT, Ta'ita'ifono; Iosefa Uilelea FT, Failautusi</i>	\$10,000.00
Ta'alolo a Leusoalii..... <i>Tanoalei'a Tunupopo FS ma le afioaga</i>	\$10,000.00
Lolo Matalasi Moliga..... <i>Kovana Sili Amerika Samoa</i>	\$2,000.00
Gaoteote P. Tofau..... <i>Peresitene Senate Maota Mauahuga</i>	\$1,000.00
Savali Talavou Ale..... <i>Fofoga Fetala Maota o Sui</i>	\$1,000.00
Bishop Peter Brown..... <i>Ekalesia Katoliko Roma Puleaga Samoa Pago Pago</i>	\$1,000.00
Rev. Asi Tuisalaega, Sea..... <i>Sinoti Amerika Samoa; Ekalesia Metotisi i Samoa</i>	\$2,000.00
Rev. Elder Faamao Asalele..... <i>Ekalesia Faapotopotoga Iesu i Samoa</i>	\$500.00
Pulu Ae Ae Jr..... <i>Sui Ofisa Faipule Uosigitone</i>	\$300.00
Faleosina Voight..... <i>Faatonu Galuega Lautele</i>	\$100.00
Rev. Elder Faaeteete & Mina Saifoloi..... <i>Ta'ita'ifono EFKAS</i>	\$1,000.00
Rev. Elder Dr. Leatulagi & Vagai Faalevao..... <i>Sui Ta'ita'ifono EFKAS</i>	\$2,000.00

Fa’afetai Fa’apitoa: Rev. Dr. Elekosi Lafitaga, FFA

E fia fa’aiu lenei Lamepa fa’apitoa i le fa’aleoina o le agaga o le fa’afetai tele i le susuga i le faifeau foma’i ia Elekosi Lafitaga. O se tasi lea o alo a le Ekalesia ua valaauina ma o loo galue nei i le galuega fa’afaiiaoga i le Seminare Faafaifeau i Kanana Fou. A o lona tomai fa’ainisia (engineering), na filifilia ai o ia e le Lauaufono ma le Komiti o Feau Eseese e fai ma ‘Project Manager’ o le galuega i le malumalu.

I lea tofiga, sa galue ai o ia e fai ma sootaga a le Komiti o Feau Eseese ma le kamupani a le Paramount sa feagai ma le fa’atinoaina o le galuega o le malumalu. Mai lava i le amataga o le galuega seia oo i lona iuga, o le susuga i le faifeau foma’i ia Lafitaga sa fai ma ta’ita’i fa’atonu o le galuega, e fa’aleoina le finagalo a le Komiti o Feau Eseese agai i le Paramount i le fa’atinoaina o le galuega, ma fautuaina le Komiti ma le Lauaufono i tulaga o le galuega ma mea e manaomia e fa’atino lelei ai.

O tofiga fa’apea, aemaise o galuega fa’ainisia, e le tau-gofie. Peitai, ua avea le fesoasoani malosi mai o lea alo a le Ekalesia, ua mama ai le avega a le Komiti o Feau Eseese fa’apea le Ekalesia Aoa o le galuega o le malumalu.

E momoli atu ai le fa’afetai i lau susuga i le faifeau foma’i. Faafetai le onosa’i. Faafetai loto Ekalesia. O lou tuutuu laau mai ma lou fesoasoani malosi mai, lea ua mae’a ai le galuega a le Ekalesia. Ia fa’amanuia tele le Atua i lou soifua ofoina atu. O tiute ma tofiga e pei ona valaauina ai, e i ai fa’atasi ma fa’amanuiaga a le Atua, e le gata i lou susuga, ae fa’apea le faletua ma le nofoalo.

Maimoaga i le Faapaiaina o le Malumalu

Tau ’aaoina mea alofa EFKS



Taalolo a le Afioga o Leusoalii, Samoa



Sauniga i Fafo



Mo isi ata, silasila i le itulau a le Ekalesia i le Facebook: @GenSec.CCCAS



Sauniga i le Malumalu



Tausamaaga & Faaaloaloga



Maimoa i le Sauniga atoa i le itulau a le Ekalesia i le Youtube: https://youtu.be/sqY_PzkrQqY